

游雲山聖壽萬年宮道士趙道一編修

葛仙公

仙公姓葛名玄字孝先家本琅琊世傳葛祖高祖盧為漢驃騎大將軍封下邳侯後讓國與弟文托遂南遊江左道遙丘壑適丹陽句容見其山水秀麗風俗淳厚深合雅意偶會仲弟孫來為別駕一日參侍而言曰吾從祖既為春伯而弟孫可為仲雍之後乎因是同居焉仙公祖矩仕漢為黃門侍郎父孝儒歷大鴻臚登尚書其先裔出葛天氏食封于葛遂以國為姓世載忠德歷代諸侯也仙公本大羅真人下降以後漢桓帝延禧七年甲辰歲四月八日誕世仙公父素奉道法即遣使齋香華錢詣本里玄靜觀求香水浴兒時有自然道士支道紀注莫知其所由來問尚書得男乃欣然與來使曰吾昨宵夢見道玄真人從大羅天下降與吾言昔別已經劫子將忘我耶子作禮稱弟子願得無上正真道眼汝歸悉告尚書明日當往賀君生奇男使者歸

以實聞越一日道紀果來賀尚書告曰始有此子國為宗嗣計式副願望道紀求兄者母有難色父令抱兒出道紀見兒不覺起敬尚書驚問道紀曰吉之先見敢以為賀此兒有紫氣覆之狀如寶蓋神光流轉煥耀當為神仙非世間常見比尚書曰仙聖家變變化茫茫深不可測願得壽考以為宗嗣足矣道紀曰聰明智慧暫經人世九天稱慶七祖同歡生者被福死者登天道紀遂念真人宿世之功因作禮十方仙聖永保元吉禮竟為仙公作讚其辭曰身雖輪聖化鬼神無暫滅宿福積重緣音願非今日大羅真人降仙聖含真出天龍漱香花濯我煉胎質微言將誰信靈期玄佑畢道心超不二混成表元一獨悟本無想放朗大乘遠頌畢道紀長揖而出儼然不見仙公年八歲失怙恃已能好學自立生而穎秀英姿發天才超質性識明茂至十三通古今九經傳子史靡不該覽有父手澤履跡必仰天號泣飛鳥為之悽鳴悵然曰山川不改色履父已歸空天下有長生不死之

道何不修之因道遠靈嶽遐求異人常好彈琴誦莊老安閑澹泊內足無求年十五六名振江左時賢欲辟為掾仙公曰蔬食被褐枕石漱流吾所樂也豈能以此而易彼哉乃水道家服入天台赤城上虞山精思念道所願有得遂遇真人左元放授以九丹金液仙經煉炁保形之術治病勸鬼秘法三元真一妙經行持三年廣積功效靈帝光和二年正月朔感太上老君勅太極真人徐來勒等同降于天台山老君乘八景玉輿從官千萬正一真人侍焉老君自號太上一真人曰定光為洞經高玄法師命侍經仙郎王恩共披九光玉輶出洞玄大洞靈寶經凡三十八部以授仙人葛玄及上清齋法二等并三鍊七品齋法三鍊者曰金鍊齋謂保鎮國祚曰玉鍊齋保佑后妃注公侯貴族曰黃鍊齋指度九玄七祖永辭長夜之苦七品者曰明真齋超度幽爽解諸冤對也曰自然齋普為眾生請福謝罪學仙修行之法也曰三元齋自謝犯戒之罪解考於三官也曰八節齋謝玄祖及已

身之罪滅無薄之法也曰洞神齋以精簡為上求仙保國之法也曰持教齋以清素為貴救疾禳災之法也曰塗炭齋以苦節為功悔過請福之法也并勸戒法輪經四十五卷無量通玄轉神入定等經以授仙公俾行教於世曰子應常思虛无真人高上大法王大干世界號曰老子是玄中大法師焉又示以天府所定世人罪福篇目曰感應篇又曰功滿三千白曰昇天修善有餘坐降雲車弘道不已自致不死仙公稽首禮謝今天台山桐栢觀有法輪院三真降經之處及仙公夜鬼所築受誥壇存焉仙公年十八九歲仙道漸成乃遨遊山海倏忽去來遂東入括蒼自侍其叔叔諱彌字孝公時授業橫經四方矣才肩摩袂接立講堂於其居仙公歸拜之彌勞問翱翔之意曰予嘗念子幽窈與人書踈開仰盼青雲俯臨滄海險阻艱難備嘗之矣古人所憚子能為之今天下文明三國求士子才博術奇必是出也仙公告曰玄稟性愚鈍不通世用負辜先緒謝千祿之容辭負罪之士

嘗絕志巖穴棲心煙霞流浪山水以此為樂庶期與消子為交赤松結友惟叔父遠弘道藝講論五經洙泗之風翕然復振詩雅之道感於今日三國隆平必尚無為之化如玄曠遠固謝時榮願叔父策名委質亮天蒸載垂裕後昆彌答曰子絕類離倫超凡入聖吾所不及當勤衛生之經思慎終之語然後鼎湖之舉何足為難仙公辭謝而去復周旋於括蒼南嶽羅浮諸山以下修煉金丹之地遂遙選經由玉筍詣閭皂乃登東嶽高峯之上而望焉曰形閭色阜土良水清此真仙之住宅吾金丹之地得之矣然丹成之後必須廣積陰功超度群品庶幾三天書名九霄列職無愧於心矣乃慨念漢家傾覆三國戰爭早潦凶荒兵傷殍死不可紀極窮寃滯魄沉淪惡趣難出輪迴於是刪集靈寶經話撰成祭煉大法生天寶錄靈符秘訣等奏聞天帝建立法壇每於三元八節吉日良宵普召十方諸大地獄窮寃滯魄來詣壇前俱受祭煉祇承符錄各遂超生行持之後屢有感格時當甲

午歲下元今節之夕正值祭煉之時有一鬼王形長五丈身衣緋袍誓首再拜前進而言曰某為下鬼統管窮寃動經累劫沉淪惡道無有出期每蒙真仙普設法筵祭拔寃與給賜符錄濟度幽冥數百萬象俱獲超生我等悉沾善利同聽法音感德難言徑來朝謝且聞玄天北帝勅示請織鬼寃云葛真人祭煉年深功積玉書名標金簡五年之後宜三天降詔錫命同頌上列天書矣言訖辭謝而退於是仙公以祭煉經法寶錄符文訣目等付閭阜宗壇及沖虛壇流傳後學廣度沉淪仙公再念群生得遂人身上於樂國恣情縱慾不修正道罪愆既積業報難酬惟靈寶三乘秘典可以開導衆生懺悔罪尤拔濟苦爽俾悟真正遂總括上清靈寶諸部真經撮其樞要集為慈悲道場九幽大懺法一部十卷流傳天下善信男女或有宅舍生災春親亡殍廣建道場嚴陳真像禮誦九幽大懺當得見存獲慶過去超生宿業新愆皆消滅寒庭罷對苦爽沾恩此懺法流傳四海惠利無邊

仙公佩受上清靈寶諸部真經精心研誦復於洞神太清部內增廣道德注釋撰成經序冠於篇首仍品題清淨經云吾得真道會誦此經萬遍吾昔受之於東華帝君東華帝君受之於金闕帝君金闕帝君受之於西王母

皆口口相傳不記文字吾今於世書而錄之則此經流傳實自仙公始昔仙公過真師授以分形萬化之術靈感應變之法能坐薪縱火而衣冠不焦酣飲卧泉而身體不濕逾次過親朋輒邀止折草刺樹汁以杯盛之流通

如泉杯滿即止勸客飲皆旨酒也取瓦礫草木之實勸客曰此乃飯核食之皆脯菓也嘗有客從仙公泛舟見箱中有十數符客曰此符之驗可得見不仙翁即取一符投水中遂水而下仙公曰何如客曰常人投之亦爾仙公復取一符投水中逆水而上仙公曰何如客曰異矣仙公復取一符投之符即不上不下須臾上符下下符上會於中流三符聚而止良久而收之又於水濱見鬻大魚者謂魚主曰欲假此魚到河伯魚主曰此已死矣曰

亦可以丹書紙內口中投於水則躍然而去嘗有客來謁既坐有繼至者復見仙公迎與俱入而座上仙公自與客談笑不動時苦寒謂客曰居貧不能設爐以致暖試作火以待諸君於是口中吐氣火赫然而出須臾屋中

火滿又感暑中卧次使人傳粉腹上謂客曰苦熱不能作他戲乃以腹徐徐上摩屋梁而粉著梁上又與客對食因言神變之事客曰食畢當作一奇戲食未已仙公曰諸君得無欲速見乎即吐口中飯盡成飛蜂滿室或集

容身莫不震悚但不驚人良久張口蜂却飛入為飯復食之復指牀使行指蝦蟆及諸蟲使飛燕雀龜之屬使舞應節如人也復以冬為客設生瓜棗夏致冰雪又以數十錢使人散投井中仙公以一器於井上呼錢出於是錢一一飛從井出皆向所投也又為客設酒無人傳之杯自至前如或不盡杯不去也又仙公嘗行遇一神廟凡過者離百步下車否則有警廟傍有大樹數十株上有數禽人畏莫犯仙公乘車直趨俄然大風驟起塵埃障

天從者驚怖仙公怒曰小邪敢爾舉手指風風即止以一符令人投廟中禽鳥皆墜死廟屋自焚仙公過武康見一人家病作命巫祀妖邪其邪附巫者令仙公飲仙公不飲而精邪出語不遜仙公厲聲叱曰姦鬼敢爾救社

伯搜精人頭付柱鞭背但聞鞭聲出血流地精人怖謝曰竹犯其人願乞赦原仙公曰汝是何等邪精速自首告曰是後山鬼仙公曰赦汝罪要病者愈限三日為期否則痛治無赦仙公嘗過華陰見一士人溺於蛇精之家

仙翁化作一田夫驅黃犢而耕因說士人曰汝陷身於非地此婦人乃蛇精也前後啖食生人不計其數引士人看古井中皆是白骨盈積遂教士人窺之即望東而走吾當救護士人如其言窺之果蛇精也張牙怒目在網帳中附一小蛇兒在身旁仙公誅而斬之即有無數小蛇來救援仙公盡數誅戮畢以一符與士人服即吐出蚯蚓蝦蟆之類遂得全生昔仙公感太上老君授以霹靂火府雷法策役雷神誅伐不道吳赤鳥二年正月一

日仙公登勞威山精思念道是時日中感太上授以千真科戒乃與眾真演說勸戒未悟流傳於世仙公又嘗在荆門軍紫蓋山修煉值天寒大凍仙公跣足衣衫藍縷時有屈家二女窺見憐其忍冷晝夜促成雙履次日欲獻之往煉丹之所仙公已去但存爐及尚溫二女撥灰而得丹一粒姊妹分而服之自後神氣沖沖不飢不渴惟慕清靜後隱去時人謂得仙矣見同馬子微仙公與天師相為表裏遺蹤逸跡亦多在蜀中歷世家邈時人無能知者難以備舉仙公嘗在盱江麻姑山小有洞天修煉鑿五井以應五行上應五星至今其泉消息盈虛以一至五周而復始若有度數其井在麻姑山前是時吳主以賓禮待遇仙公一日與仙公坐危樓遙望道間人奉土神禱兩吳主曰百姓思雨寧可得乎仙公曰可即書符令人焚社中頃刻天地晦冥風雷驟起澍雨立至大蘇苗稼仙公嘗從吳主船行至三江口阻風船多漂沒仙公船亦不知所在吳主嘆曰葛仙公有道何不能免此這使求

之踰宿忽見仙公水上步來既至尚有酒態乃謝曰昨伍子胥強邀留飲淹屈陛下于此上忻然曰先生常為神靈所延道德所至爾一日遊會稽聞道遠自適有會稽賈人自海中遠過一神廟忽睹廟吏延賈人曰欲寄一箋與會稽山葛仙公即以書函擲賈人船中函蓋如釘投之不動及還會稽白仙公仙公接書函即自發乃東華小童書題曰太極左宮仙公閣下字皆科斗古文人因見其書乃知仙公名在天關久矣吳主一日請仙公陞殿焚香清齋弟子張泰孔龍鄭思遠等侍側焉吳主曰朕以暗昧未達玄旨好聞神仙之說願師指教秘典齋直及修真之捷徑道經之品何者為先符圖秘要何者為妙開發未悟以副願望仙公避席曰既蒙聖主特賜垂問敢有所隱但非國君所篤好若萬機之餘能靜心守一其則不遠矣夫神仙之道微妙各載丹經學道修仙先修戒行方見漸階道行既立乃可服食靈藥導引元氣熾納太和呼吸陰陽固煉內丹可以為地仙入火不

灼入水不濡過度髮危却禍來祥然須齋直得成此經出太上靈寶洞玄大道元極自然真一五稱文中古三皇內書論其神仙事象妙悉歸於靈寶大法昔張天師得仙親遇太上授以正一盟威修真秘訣及靈寶五稱文出齋事為首如靈寶大法其文簡要義趣弘深難可舉舉夫地仙先登靈山為山神主大期六百年或三百年者後皆補天仙惟於九轉金液還丹金液玉醴皆得乘雲駕龍白日昇天如大洞真經誦之便可昇舉坐見十方不須服御丹液風有仙骨得見斯文盜竊靈文者如有翅不能飛須要從師授受口訣告盟天地真仙乃可傳也三皇內文五嶽十地神州七變七寶靈園內篇皆上仙之所寶夫學道者從微至著自邇陟遐不可越略靈寶符圖至尊至重可度太陽九百六之災真人超邁三界者皆由此道矣吳主曰宿緣流慶得為人君仰遇仙姿既聞好音雖沈酒浮華然持敬在心無書之於金簡封之於玉函不敢輕示非人當終身欽奉仙公曰陛下能爾

善哉子時有釋道微遠聞仙公得道故來求師焉作禮請問曰我聞道無先後無古今不審其道同異仙公曰本無高下貴賤形名之殊是以字之曰道老子生於天地之先應化於商宗之世廣宣道教化誘華夷應物自然永無生滅也仙公曰左為陽陽主生右為陰陰主滅至陰無生至陽無滅自然之理也但大道深秘不傳流俗非天下至人莫得而聞之也道微再拜稱嘆曰善哉願聞其道仙公曰夫人功德未備不求仙子等宿命功滿德備我先世已為子等師夤緣會遇汝將度世矣乃於天台山立壇投道微五嶽真形圖告曰此太上傳命之信執之遊八方名山三界奉迎又以太上金丹經靈寶自然五稱寶曜文三皇內文大有妙經金書玉光靈書紫文大洞三十九章太霄隱書明鏡圖錄等并太極龍騰芝草一莖告盟仙官各令佩身命弟子鄭思遠具宣口訣又告思遠等曰吾昔從左元放先生於赤城山受五嶽圖及金丹經今付於汝其於諸品符錄洞真洞玄洞神真

經等是太極真人徐來勳於會稽授我己流傳於大江之西閩卑福地此乃上方禁文自有飛仙守衛今付汝等宗奉大法然九天禁重勿示非人若有至心之士依四極明科年劫傳授思遠等再拜承戒命又與道微仙藥一粒令辟殺除五味食嗜之類可以速遊名山絕人世事道微受服及流明七曜紫九之丹即覺體輕心神怡然無所思欲及百日齋竟仙公又告道微曰子當還嵩山齋三年後往王屋山清齋精思大法道微既受指要寶經靈藥不飢不渴願少留侍左右仙公曰子心存我我即可見不必依戀今子凡軀始學未得洞視子當登高高到彼見諸真當復教子矣後五年又當付子秘訣成子之道方得洞見無形觀十方如指掌若明鏡中物爾子等當處閩風臺三百年應昇天也夫仙道有即世白日昇天者亦有十年數十年數百年者三千歲五千歲一萬歲乃得昇天者其未得昇舉之時權舍諸五嶽名山洞天福地及八海中復有十洲三島皆七寶宮殿瓊樓

玉房自然金銀珠玉神仙之藥珍奇異寶百千萬種不可名狀自然音樂聲發太虛鸞鳳麒麟交羅戲舞玉樹瓊林之中清風雅韻皆如九韶之音凡仙人未得昇度者居此山內外宮殿宴樂從容子輩同遊豈不幸耶但廣積善功當遊五嶽謁諸真公吾今不得停此諸山與衆真游息子齋七日可服前芝不須飲食和氣怡然未有差期況進修大經乎又於天台名山告鄭思遠曰我所授上清三洞靈寶中盟諸品經錄吾昇舉之日一通付閩阜名山一通付吾家門弟子世錄傳至人不可輕授非人勿示若得其人宜傳勿秘又論門人曰吾按行五嶽稅駕蓬萊時暫還京都謁謝吳主因會從弟吏部郎吳言曰吾吾門弟子有通才博學馳譽朝廷克昌門祚恐未有學仙者但篤修文義威德安身樂天下憂亦不失為君子官爵亦何以加焉若真道未絕吾昇舉之後當生齊魯雅素通玄之子遊世高尚曠志清虛振起仙裔矣後即有稚川出焉晉書列傳葛洪克典藉尤好神仙

之道修養之法歷仕晉朝身居任版留意仙道乃求為句漏令欲就丹砂之便修煉大丹冀得成就却就仙公弟子鄭思遠傳受上清三洞靈寶中盟諸階秘籙九丹指要後攜妻子登羅浮山立壇昭謝天地服餌大丹舉室昇仙果符仙公先知之徵矣一日仙公辭吳主曰山林微賤久藉恩庇今者暫違丹陛未有再見之期願陛下息兵字民推誠及物永安宗社長享太平吳主曰卿性識高尚道行尊貴名隸丹臺豈容久淹塵世矣於是太子登聞仙公得道乃築別室招延日親訪問仙公曰至道之精杳冥冥至道之極昏昏默然無視無聽抱神以靜形將自正必靜必清母勞汝形母搖汝精乃可長生此廣成子答軒轅黃帝所請也今殿下位居儲宮將嗣大寶要在清心寡慾遠佞尊賢投擇英豪先宅天下爰調四序撫育群黎此乃四海無疆之休豈特一身之福也太子曰親卿所陳允合時論然子意亦欲修身以及國且丹經非造次可聞至道精微非萬機之餘能悉研究又

問仙公莊周云六合之外聖人存而不論六合之內聖人論而不議何也仙公曰六合之內圓於形象陰陽之數猶可致詰六合之外人所希見渺茫之中太虛之表聖人固迷故存而不論也太子緝善至嘉禾二年正月朔日仙公辭太子而去出京謂弟子曰比為主上淹留而光陰迅速老之將至功用雖積金丹未煉不可徒費歲月徑往閩阜福地於東峯之側建庵曰卧雲琴壇立窻居其中謝絕人事修煉九轉金丹時有瑞氣祥光映照山谷越三載大丹成熟遂於洞口金沙池中浴丹其泉忽然湧漲金沙騰沸仙公曰是丹火力尚炎未可便服遂藏之東崖石室中以待醱謝天地然後服之迄今丹池之內金沙自沸靈迹可驗仙公凡經二十二處修煉未見功效如近境有赤城長生招仙杯山麻嶺西山冲虛皆有仙壇煉丹靈迹惟於閩阜方得成就遂作流珠歌云流珠流珠役我形軀奔馳四海歷覽群書披尋不悟情思若愚焚編金石燒竭珠貫財蕩盡拊膺長吁吾年六

十功效躊躇賴師指授元氣虛元窈冥中起恍惚中居真陰真陽一吸一呼先存金鼎次認玉爐離火激海坎水升虛玉液灌漑洞房流酥天機真露萬類難如真人度人要大丈夫天長地久同看仙都念茲在茲語吾記吾仙公煉丹之時常於西峯石壁上石曰之中搗藥因遺墜一粟許有飛禽過而食之遂得不死至今夜靜月白風清之時其禽乃作丁當杵臼之聲名之曰搗藥鳥有聚高仙聞仙公得道自東海跨雙鯉而來訪仙公於卧雲庵翁與之酣飲既醉而高卧白雲間酒醒則雙鯉化為石矣仙公遂以雙鶴贈之乘跨而往其石至今存後山之間仙公於赤烏元年太歲戊午十一月初一日蒙太上節次三頒錫命遣天吏告下福庭第一錫命曰太上玉書勅無上學仙弟子葛玄先世苦行累劫立功損身布施濟度危亡積感太上遂令名注玄都上仙定籍是故英明智慧誕降德門所以才質玉秀聲蘭清發天姿逸穎卓然挺拔道模淵偉獨步羣萃高辭世榮抱樸尚質注

意仙經合光守一徜徉林麓不戀朝市慈心  
度人拳拳不輟道德既充宜有錫命今賜子  
天寶羽服丹霞綉轡飛羅之裙矣芙蓉寶冠  
金真神虎仗命魔幢役海召山所為任意第  
二錫命曰勅無上學仙弟子葛玄隱縉經  
長齋靜念存思專精苦而不倦再賜子八景  
玉輿駕龍乘雲項生圓光金章玉文以酬宿  
德紀綱道門後賢仰止東持法輪太上尊教  
三天所銓矣第三錫命曰勅無上學仙弟子  
葛玄體德弘道開化未悟普濟群品俱超方  
覺功成名揚高真信服三界群靈尊奉穆穆  
恩盈十方咸濟所欲也宜錫子位為太上玉  
京太極左宮仙公總統三界六大魔王之  
官主行三洞經籙給真仙玉童玉女各五百  
人侍直左執九耀之華幡右捧洞玄之真經  
龍祈虎節遊行上清九宮一年三朝太上玄  
都玉京金闕太上錫命天帝承書一如三天  
故典奉行赤鳥元年太歲戊午十一月一日  
甲子日中天帝諱遠奉勅命告行於霍童山  
又曰仙公金丹已熟又蒙玉帝三頒錫命不

得久住人世當立壇醮謝天地山川百靈方  
可服餌乃於福庭之中築壇一所名曰八景  
乃擇吉日登壇告謝天地大醮三日跪服金  
丹于時天花飄地神光燭天仙公再謂門人  
弟子曰金丹既服當有勅命自天而降吾輕  
舉有日矣乃將三洞四輔經籙秘藏於靈壇  
之上後當有吾門弟子精心宗奉於此流傳  
秘典靈文福被四海矣於吳赤鳥七年八月  
十五日日中忽聞仙樂嘹亮旌幢翳天麟駕  
羽車浮空香至仙童玉女靈官翊衛先後下  
降壇所時有飛天神王捧持玉詔仙公端簡  
長跪面天門聽宣詔曰勅無上學仙弟子靈  
寶經籙大法宗師葛玄久專至道善養胎精  
演真經祭煉於沉寃集仙典開明於後學可  
謂陰功濟世密行齊具名錄玉都身歸天界  
可特賜子位為太上玉京太極左宮仙公總  
統三界六大魔王之職主行三洞四輔經  
籙事可於甲子歲八月十五日午時飛昇徑  
赴闕庭仍賜玉函金丹仙衣等太上詔命天  
帝承書依法啓迎一如三天舊典勅天帝諱

遠奉旨告行於闕阜福庭仙公望天門再拜  
受詔訖遂與弟子鄉朋分別於東峯之側登  
著衣臺身披離羅之服頭戴芙蓉之冠項負  
圓光手執玉簡絳裙朱履玉珮鳴珂坐八景  
琅輿霓旌絳節前後導從仙童玉女左右衛  
迎祥雲白鶴盤繞空碧冉冉而昇弟子鄉朋  
攀戀不已於是仙公暫停仙駕賦五言歌詩  
三篇降付鄉朋善令歌誦開悟方來并天之  
年八十有一三篇之詩次列于後其一曰真  
人昔道教愍念孤癡子嬖邪不信道禍亂由  
斯起身隨朝露晞悔何有已罪大不可揜  
流毒將誰理冥冥未出期劫盡方當止轉輪  
貧賤家仍復為役使四體或不完整覺行乞  
市不知積罪報怨天神不恃大道常無為弘  
之由善始吾今獲輕舉修行立功爾三界盡  
替首從容紫宮裏停駕虛無中人生若流水  
臨別屬素翰粗探靈妙紀其二曰我今便昇  
天愍念諸儒英大道體虛無寂寂中有精親  
之若冥昧窈窕中昭明莫言道虛誕所志不  
至誠莫不登山誦是洞真經一諷而一詠

玄音徹太清太上輝金容衆仙齊應聲十方  
 散香花燼煙栴檀馨皇娥奏九韶鸞鳳諧和  
 鳴龍駕翳空迎華蓋耀香冥脩間劫仍臺帝  
 釋條降度八王奉丹液挹漱身騰輕道遙有  
 無間流朗絕形名神重俠侍側自然朝萬靈  
 飄飄八景與遊宴白玉京七祖昇福堂先亡  
 悉超生王侯能篤信必爲天下貞大人體至  
 德一切兼其成其三曰散誕遊山水吐納和  
 靈津鍊氣同希夷靜誦道德篇至心宗玄一  
 冥感今乃宣飛駕御九龍飄飄乘紫煙華景  
 耀空衢紅雲擁帝前暫迂蓬萊宮倏忽已賓  
 天偉偉衆真會渺渺凌重玄體固無終劫金  
 顏隨日鮮懽樂忘上境悲念一切人誰能離  
 死壞結是冥中緣悠悠成至道無有人無間  
 微妙良難測智者謂我賢若能弘衆妙輕舉  
 昇神仙歌畢雲輿昇舟昇天而去十八仙公所著  
 老子道德經序及斷穀服食方三卷入山精  
 思經十九卷洎神仙歌詩令遺世間兵書云  
 先帝好道術有事仙者葛玄嘗與遊處帝重  
 之特爲於方山立洞玄觀後仙公於閭阜白

日昇天至今方山猶有煮藥鑪及丹臼在焉  
 按輿地志於赤鳥二年建立方山觀也宋徽  
 宗崇寧三年二月二十八日奉勅臨江軍清  
 江縣閭阜山葛仙公壇山川勝境仙聖所居  
 其威德茂功顯聞于世者朕必秩而祀之惟  
 真人寄言立稱威造宗極出入無吟與道翺  
 翔壇于琳宮積有年所析穰休息美利在民  
 賜嘉褒榮特建崇號尚祈歆懌永福此邦可  
 特封冲應真人理宗淳祐六年三月十七日  
 奉勅臨江軍清江縣管下閭阜山葛仙公冲  
 應真人莊周氏云神人使物不疵厲而年穀  
 熟仙之謂歟爾修于名山以成妙道世傳飛  
 昇尚矣在崇寧間固已錫封迺者都使者從  
 邦祀之請復以祈禱應響歲事屢豐之狀來  
 上朕於方士說無所嗜嘉其有功於民爰命  
 禮官用衍稱謂若夫乘雲御風游乎八極之  
 表何有於名然姑以見朕褒表之悅也可特  
 封冲應孚佑真人

歷世真僊體道通鑑卷之二十四 漢四  
 游雲山至壽萬年言道士趙道二錄修  
 鄭思遠  
 鄭思遠少爲書生善律曆候緯晚師葛孝先  
 受正一法文三皇內文五嶽真形圖太清金  
 液經洞玄五符入廬江馬迹山居仁及鳥獸  
 所住山虎生二子山下人格得虎母虎父驚  
 逸虎子未能得食思遠見之將還山舍養飼  
 虎父尋遠休思遠復思遠每出行乘騎虎父  
 二虎子負經書衣藥以從時於永康橫江橋  
 逢相識許隱具煖藥酒虎即捨柴然火隱患  
 齒痛從思遠求虎鬚欲求熱挿齒間得愈思  
 遠爲之拔之虎伏不動  
 巨道一曰道德經曰上善若水水善利萬  
 物而不爭思遠可謂上善者也至於養道  
 林泉仁及鳥獸且虎乃害人之獸人共惡  
 之思遠乃憐虎子之失母收而飼之古人  
 所謂養虎自患者此必然之理而思遠不  
 見其爲患且負經書衣藥以從及捨薪而  
 然火可謂道之高德之厚上善之感也

歷世真僊體道通鑑卷之二十三